

Gabh, a mhic, mo mhúnadh-sa

[Thomas F. O'Rahilly: *Measgra Dánta I*, poem 11]

1 Gabh, a mhic, mo mhúnadh-sa
ré dtoichim uaim ar eachtra;
do dhol as an dúnadh-sa
is de thiocfas do leas-sa.

2 Gé chanaid na míodhaoine
aitheasg nách téid i dtarbha,
briathra diana díomhaoine
nárab mian leat a labhra.

3 Ná bíodh ort 'na dhubhachas
sgéal dá olcas dá bhfuighe;
nárab mó do shubhachas
fán sgéal is fearr dá gcluinfe.

4 Lucht na mbréag gan chomaoine (?)
ná faghaid uaibh bhar n-urraim;
na ríogha is na rodhaoine
gurab iad do lucht cumainn.

5 Déshearc uait badh marthanach
d'éis imtheacht ar do thuras;
bí red chairdibh carthanach
gach uair dá roichfid chugat.

6 Déana, mar a-dubhart-sa,
a mhic bheireas gach éanbhuaidh,
mar bhadh airdri cumhachtach,
toil gach fir don aois éagcruaidh.

7 Comhaill fós go fírinneach
do ghealladh, a ghéag fhionnghlan;
badh glic sibh ór sírchinneadh (?);
mo mhúnadh ort ná hiomghabh.